

Date – 29/11/2025
Time - 7:30 -7:40 Hrs
AKASHVANI AIZAWL

REGIONAL NEWS BULLETIN

HEADLINES (MORNING)

1. ZPM sorkarin kuthnawktute tharchhuah sawhthing an leina man an pe tla tawh tih ZPM Party chuan thuchhuah siamin a sawi.
2. Nitin inhlawhfate humhalhna tura Sorkar laipuiin dan thar a siam, Labour Code chu Mizoram-ah pawh hmantheih tura ruahmanna kalpui mek a ni.
3. Prime Minister Narendra Modia chuan ram changkang Viksit Bharat tihhlawhtlinna chu ram mipuite inpumkhatnaah a innghat a ti.
4. Defence Ministry chuan US siam helicopter MH-60R lei turin cheng vaibelchhe 7900 inremna an siam

<><><>

GINGER

Chief Minister Pu Lalduhoma kaihhruai ZPM sorkarin a lo intiam tawh ang ngéiin, kuthnawktute tharchhuah sawhthing an leina man an pe tawh tih ZPM Party chuan thuchhuah siamin a sawi.

An thuchhuaha an tarlan danin, Mizoram puma sawhthing an lei zawng zawng Kg nuai 3 sing 3 & 8,350 chu Kg-ah Cheng 50 in an lei a, hemi atana senso cheng Vaibelchhe 137.72 chu mipuiah pek kim vek a ni tawh a ni.

Hetihlai hian kumthar 2026 February thla atangin sawhthing hi a lei chhonzawm leh dawn a, Kum tharah pawh sorkarin sawhthing hi 'price support' a la pe chhonzawm zel dawn bawk a ni. ZPM thuchhuah chuan Agriculture Minister Pu PC Vanlalruata'n Kg. 1 cheng 50 aia hniama hralh te tân lungngaihna tur a awm lo nia a sawi chu mipui tana ding reng sorkar an nei tih a tarlang a, Sawhthing lei chungchanga lungawi lo te an awmin, an tana vuivaina District Agriculture Marketing Committee (DAMC)-ah thlen theih a nih thu Agriculture Minister in sawi pawh langtlang leh mipui sorkar a nihzia tilangtu a ni an ti.

<><><>

CESJ

Assam Rifles ram chhuahsan hman dan tur reltu Advisory Committee thutlukna siam danah an ngaih a that loh avangin Centre for Environment and Social Justice (CESJ) chuan committee invitee an nihna atangin an inhnukdawk tih an sawi.

Nimina CESJ hruaituten Aizawl press club a thuthar thehdarhtute an kawmna ah CESJ Treasurer Pi Saizampuii Sailo chuan Advisory Committee meeting thutlukna siam danah CESJ aiawha tel thinte an ngaih a tha lo tih a sawi a, Advisory Committee-a Invitees anga an tel zel chuan, Sawkarin AR

chhuahsan ram, a duh ang anga hman remtih puitu atan chauh an tel ve nia a lan dawn avangin an pawl tan tel ve zel chi nia an hriat loh thu a sawi.

AR chhuahsan ram chu mipui len vahna thengthaw nuam leh boruak thianghlim petu atana zuah an duh avangin Laldenga Cultural Centre sak tum pawh cancel turin an lo ngen tawh thu a sawi a, tuna Convention Centre sak tura thutlukna siam a ni leh chu tha an tih loh thu leh Advisory Committee chu mipui duhdan emaw, environment tana tha tur lam aiin, sorkar duhdan leh ruahmanna tipuitlingtu atana hmanrua mai nia an hriat avangin inhnudawhna lehkha Chief Minister hnenah an theh lut tih a sawi a ni.

<><><>

LABOUR CODE

Ramchhunga nitin inhlawhfate tana Sorkar laipuiin an dikna leh chanvo a pekna dan thar Labour Code thar chu Mizoram-ah pawh hmantheih tura ruahmanna kalpui mek a ni a, he dan thar hian hlawm chi hrang hranga hnathawk te dinhmun tha zawka a hlankai beisei a ni.

He dan thar hian kum tam tak lo hman tawh labour law hlui chu awlsam leh huapzo zawkin a rawn siam dawn a, Sawrkarin labour code thar hman tura a tihte hi Code on Wages, 2019, Industrial Relations Code, 2020, Code on Social Security, 2020 leh Occupational Safety, Health and Working Conditions Code, 2020 te an ni a, Central Sorkar chuan a chanpual bik a pehfel thawkhat tawh a, State in a chanpual her danglam tura a ngaih pawimawhte State rules siam tur chin a tih pawh tunah hian Mizoram Sorkar chuan pass theih tura buaipui mek a ni.

Mizorama Labour Employment, Skill Development and Entrepreneurship Department (LESDE) Director Pu John Tanpuia chuan a ram pum huapin hnathawktu tam zawkin he dan thar hi an thatpui a rin thu a sawi a, India sorkar chuan kum 2047 ah India chu Economy-ah a thang chak ber ni thei turin hmahlir a nei a, chumi atan chuan he Labour Code thar hia pawimawh ber anih loh pawhin a pawimawh ber te zing a mi nia a hriat thu a sawi a, Mizoramah pawh hmahlir nei ran a, he dan hian a huam theih tur hnathawkte an lo thahnem zel a, Labour Code in heng hamthatna a rawn chhawpchhuah ah hian te hian tel ve thei turin Mizoramah pawh sorkar hna ringawt ngaihtuah lova Industry lam hawi a ngaihtuahna siam a hun tawh hle a ti a, hetiang lam hawi a kal a, tuna labour code incentive kalpui tan tur hi beisei phakbak leh hriatthiam phak bakin hnathawk te hum a tum a, hlawk taka hna thawh a nih theih nan Mizo mipui ten ngaihtuahna thar an sen a ngai tih a sawi a ni.

<><><>

DOMESTIC VIOLENCE WORKSHOP

Directorate of Women & Child Development hnuaia State Hub for Empowerment of Women (SHEW) chuan Domestic Violence Week 2025 pualin hmeichhiate chung a hleilenna thleng thin chungchang inzirtirna hun a buatsaih a,

Mizoram Assembly House Annex Conference Hall-ah ‘Empowering Women - Last Mile Delivery of Service’ tih thupui hmangin inzirtirna hun hi a neih a ni a, 16-Day Campaign on Ending Gender-Based Violence hawn nghal a ni.

He hun hmanpuitu Social Welfare, Women & Child Development Department Joint Secretary, Pi Zonunthari chuan thu sawiin, hmeichhiate chungah hleilenna chu hmeichhiate dikna chanvo palzutna mai ni lovin mihring dikna chanvo rahbehna a ni, a ti a. Khawvel puma hmeichhiate chungah hleilenna thlen nasatzia tarlangin, mipuite hnena hetiang lam zirtirna tha pek mai bakah hmeichhiate chu tihchak a, an dikna chanvo hriatchiantir a pawimawh a, an dikna chanvo hum thei tura eizawna mumal an neih leh justice system an banphak a ngaih thu a sawi a. Hmeichhiate chungah hleilenna tibo tur chuan fapate enkawl uluk a ngaih thu sawi bawk a ni.

He inzirtirna hunah hian Mizo Hmeichhe Insuihkhawm Pawl (MHIP), Single Moms' Foundation, Street Vendors (UD&PA), domestic workers leh sawrkar department hrang hrang aiawhte bakah sawm bik – Association of Theologically Trained Women of India (ATTWI), Young Women's Christian Association (YWCA), Lai Women Association (LWA) leh a dangte an tel a ni.

<><><>

MAMIT CRIME REPORT

Kumin kumtir atanga vawiin thlengin Mamit district chhung police station ah thubuai 112 ziahluh a ni tawh a, nikum aiin thubuai ziahluh zat hi 96 in a tlem zawk a ni.

Mamit district chhungah hian Police station 5 leh out post 1 a awm a, kumin chhung hian heng police station 5 ah te hian vawiin thlengin thubuai 112 ziahluh tawh niin heng thubuai ziahluh zinga thubuai 94 te chu chhuichhuah tawh niin thubuai 12 te chu chhui lai mek an la ni.

Kumdang ang bawkin heng thubuai ziahluh tam ber te chu ruk ruk thubuai niin thubuai 69 ziahluh a ni tawh a, tualthah thubuai 2, naupang kum tlinglo chungah hlei lenna thubuai POCSO 9, Mi ruk bo thubuai 1 leh thubuai dangte ziahluh a ni.

Mamit district chhung police station hrang hrang zingah Mamit Police station ah thubuai 68 ziahluh tawh niin thubuai ziahluh tam berna a ni a, Marpara police station ah thubuai 4 ziahluh tawh niin thubuai ziahluh tlem berna a ni thung.

Kumin chhungin Mamit district ah police thubuai 112 ziahluh anih laiin nikum january atanga november thla chhung khan thubuai 208 ziahluh a ni thung a, heng thubuai ziahluh 208 atanga thubuai 131 ziahluh te chu ruk ruk thubuai a ni.

Mamit district police huam chhungah hian khaw 84 a awm a ni.

<><><>

FOLK DANCE & MUSIC FESTIVAL

Lungleia Art & Culture Department, Mizo Cultural Artistes' Association (MCAA) Sub-Headquarters, Mizoram Independent School Association (MISA) Sub-Headquarters leh Mizoram Teachers' Federation (MTF) District Headquarters te țang ho huaihawtin nimin khan awiin khan C. Țhuamluaia Mual-ah hnam lam leh rimawi kutpui, "Folk Dance & Music Festival 2025" buatsaih a ni a. Mizoram sawrkara Art & Culture Minister Pu C. Lalsawivunga chuan Khuallian niin a hmanpui.

Pu C. Lalsawivunga chuan thusawiin mahni hnam chin dan hlamechhiah leh kalsan chu hnam ral zia a ni a ti a, hnam upa leh fing apiangin mahni hnam tihphung leh ziarang an vawng thain an roh thin tih a sawi a. Mizo hnam ziarang leh thil hlute chu ngaih hlut leh chawi lar zel a pawimawh thu a sawi. Zirtirtute chu hun bik leh kut ni vang thla chauh lovah pawh zirlai naupangte thinlunga hnam rilru leh ziarang tuh a, hnam lam leh rimawi hrang hrang a tam thei ang ber zirtir a, an than hnan theih nan tan la zel turin a chah a. Folk Dance & Music Festival buatsaih chu Lunglei leh a chhehvel tan culture lama rahbi pawimawh tak a nih a beisei thu a sawi.

He hunah hian, MISA hnuaiia sikul 10 leh MTF sikul 3, a zavaiin sikul 13 atanga zirlai leh zirtirtu eng emaw zat telin, mi 900 chuang an pung khawm a. Zai, rimawi, lam leh lemchan bakah, hnam thuam, rimawi hmanrua leh hnam thil (bungrua) chi hrang hrangte nen hnam nunphung leh ziarang pho chhuakin, hlung takin hun hman a ni.

<><><>

NEWS

Akashvani Aizawl Regional News Unit in Aizawl, Hnahthial, Chawngte, Vairengte leh Champhai North atana Part Time Correspondent a lak tur te interview hun chu Dec ni 3 khian neih a ni dawn a, diltute chu Dec ni 3 chawhma dar 10.30 ah document kimchang nen Office ah thlen kim tur a ni.

<><><>

WEATHER

Khawchin thlirlawktu Indian Meteorological Department (IMD) chuan kumin thlasik chu kum dang aia a vawt deuh tura ngaih a ni a ti.

Hetihlai hian tun dinhmunah chuan boruak a la hniam em em hran lova, ni 2/3 chhung hian Mizoram chhungah a vawh lai berin celsius degree 12 atanga celsius degree 14 -a a tlak rin a ni a, hei hi Mizoram District hrang hrangah khaw awm dan tura rin a ni a, Lawngtlai leh hmun thenkhatah temperature hi hmun dang aia a vawh rin a ni.

India Meteorological Department Director Sudheer Kumar Dwivedi chuan Mizoramah thlasik laiin a vawh lai berin celsius degree 8 aia hniam a la tawng lova, kumin-ah erawh hei hei aia vawt hi a tawn theih rin a ni a ti.

<><><>

AIR NEWS ON SOCIAL MEDIA

Chanchinthar hi Akashvani Aizawl atanga puan a ni a. AIR News Aizawl Youtube Channel, All India Radio News Aizawl Facebook page leh newsonair.gov.in ah te chanchinthar hi ngaihthlak leh chhiar theih a dah a ni.

Vawiin chawhnu dar 2 leh a chanve-ah Chanchinthar puan leh a ni ang.

<><><>

PM

Prime Minister Narendra Modia chuan ram changkang Viksit Bharat tihhlawhtlinna chu ram mipuite inpumkhatnaah a inngat a ti. Nimina Goa Sardha Panchashatamanotsav inkhawmah he thu hi sawiin Pu Modia chuan Goa chuan harsatna tam tak paltlangin an state hnam ziarang leh kalphungte

an ti nung thar leh thei chu fakawm a tih thu a sawi bawk a ni. Nimin vek khan Prime Minister Modia hian feet 77 a sang Prabhu Shri Ram dar lim Partagali ami a tlangzarh bawk a ni.

<><><>

DEFENCE

Defence Ministry chuan US siam helicopter MH-60R lei turin cheng vaibelchhe 7900 inremna an siam. Nimin khan New Delhi-a Foreign Military Sales programme ah inremna hi ziah a ni a. Indian Navy te hman turrin heng helicopter te hi lei a ni ang.

<><><>

PM MANN KI BAAT

Prime Minister Narendra Modi chuan Pathianni chawhma dar 11 hian 'Mann Ki Baat' programme-ah ram chhung leh ram pawn mipuite hnenah thu a sawi leh dawn a, Tun tum ami hi a tum 128-na tur a ni ang.

He programme hi Akashvani leh Doordarshan network pumpui, AIR News website leh Newsonair mobile app-ah te tihchhuah a ni ang a, AIR News, DD News, PMO, leh Information and Broadcasting Ministry-a YouTube channel-ah live-stream a ni bawk ang.

<><><>